

PRAVILNIK O IZMJENAMA PRAVILNIKA O PRIMJENI ZAKONA O AKCIZAMA U BOSNI I HERCEGOVINI

Član 1.

U Pravilniku o primjeni Zakona o akcizama u Bosni i Hercegovini ("Službeni glasnik BiH", br. 50/09, 80/11, 48/12, 74/14, 85/17, 4/18 i 3/21) u članu 6. stav (1) tačke b) i c) mijenjaju se i glase:

- "b) Lož ulje ekstra lako koje je namijenjeno za upotrebu u specifičnim procesima, a koje se svrstava u okviru tarifne oznake ex 2710 19 31 10 CT BiH,"
- "c) Lož ulje ekstra lako koje je namijenjeno za hemijsku preradu, a koje se svrstava u okviru tarifne oznake ex 2710 19 35 10 CT BiH".

U stavu (2) tačka a) mijenja se i glasi:

- "a) Proizvod koji se, u skladu s propisima o kvalitetu i drugim zahtjevima, stavlja u promet kao lož ulje lako specijalno, a ovisno od sadržaja sumpora svrstava u okviru tarifne oznake ex 2710 19 62 10, ex 2710 19 66 10 i ex 2710 19 67 10 CT BiH".

Član 2.

U članu 9. stav (1) u tački c) tarifna oznaka "2208 20 69 00" zamjenjuje se tarifnom oznakom "ex 2208 20 69 20".

U stavu (3) u tački c) tarifna oznaka "2208 20 88 00" zamjenjuje se tarifnom oznakom "ex 2208 20 88 20".

Član 3.

Ovaj Pravilnik stupa na snagu osmog dana od dana objavljivanja u "Službenom glasniku BiH".

Broj 02-02-29-2/21

21. septembra 2021. godine
Sarajevo

Predsjedavajući

Upravnog odbora UIO
Vjekoslav Bevanda, s. r.

KONKURENCIJSKO VIJEĆE BOSNE I HERCEGOVINE

839

Konkurencijsko vijeće BiH na temelju članka 25. stavak (1) točka e), članka 42. stavak (1) točka c), članka 48. stavak (1) točka b), a u svezi sa člankom 10. stavak (2) točka d), Zakona o konkurenciji ("Službeni glasnik BiH", br. 48/05, 76/07 i 80/09), u postupku pokrenutom po Zaključku o pokretanju postupka po službenoj dužnosti, broj UP-01-26-2-007-2/21 od 16.02.2021. godine protiv JP Centralno grijanje Tuzla d.d. ul. Krečanska broj 1, 75 000 Tuzla radi utvrđivanja postojanja zlouporabe vladajućeg položaja u smislu članka 10. stavak (2) točka d) Zakona o konkurenciji, na 92. (devedesetdruj) sjednici održanoj dana 15. rujna 2021. godine, je donijelo

RJEŠENJE

- Utvrđuje se da je JP Centralno grijanje Tuzla d.d. ul. Krečanska broj 1, 75 000 Tuzla zloupotrijebio vladajući položaj na tržištu distribucija/opskrbe toplotnom energijom na području naselja Stupine B2, ul. M Maka Dizdar, Lamela C, Tuzla, onemogućavanjem naplate potrošnje toplinske energije preko ugrađenih kalorimetara u stanovima stambene zgrade na adresi Stupine B2 ul. M Maka Dizdar Lamela C u Tuzli, što predstavlja uvjetovanje drugoj strani da prihvati dodatne obveze koje po svojoj prirodi nemaju veze s predmetom sporazuma, te ograničavanje tržišta na štetu potrošača, sukladno odredbama članka 10. stavak (2) točka d) Zakona o konkurenciji.
- Nalaže se JP Centralno grijanje Tuzla d.d. slijedeće:
 - u roku od 60 (šezdeset) dana od dana primitka ovog Rješenja omogućiti zaključivanje novih ugovora za potrošnju toplinske energije preko ugrađenih

kalorimetara u stanovima stambene zgrade na adresi Stupine B2 ul. M Maka Dizdar Lamela C u Tuzli i da naplatu potrošnje prema ugrađenim kalorimetarima na navedenoj adresi izvrši retroaktivno od 15.10.2020. godine, te da dostavi dokaze o izvršenju.

- Izriče se novčana kazna JP Centralno grijanje Tuzla d.d. ul. Krečanska Broj 1, 75 000 Tuzla zbog kršenja odredbi iz članka 10. stavak (2) točke d) Zakona o konkurenciji, utvrđene u točki 1. ovog Rješenja, u visini od 40.000,00 KM (četdesetstisućakonvertibilnihmaraka), sukladno sa odredbom članka 48. stavak (1) točka b) Zakona o konkurenciji, koju je dužan platiti u roku od 15 (petnaest) dana od primitka ovog Rješenja.
- Ukoliko JP Centralno grijanje Tuzla d.d. ul. Krečanska Broj 1, 75 000 Tuzla ne uplati izrečenu novčanu kaznu iz točke 3. u ostavljenom roku, ista će se naplatiti prinudnim putem, uz obračunavanje zatezne kamate za vrijeme prekoračenja roka prema važećim propisima Bosne i Hercegovine.
- Ovo Rješenje je konačno i bit će objavljeno u "Službenom glasniku BiH", službenim glasilima entiteta i Brčko distrikta Bosne i Hercegovine.

Obrazloženje

Konkurencijsko vijeće BiH je pod brojem 01-26-10-246-1/20 dana 30.11.2020. godine putem e-maila zaprimilo Prijavu od strane određene fizičke osobe nastanjenog na adresi Stupine B2-lamela C, 75000 Tuzla radi utvrđivanja postojanja zlouporabe vladajućeg položaja JP Centralno grijanje d.d. Ul. Krečanska br 1, 75 000 Tuzla (u daljnjem tekstu: JP Centralno grijanje Tuzla) sukladno članku 10. stavak (2) točka d) Zakona o konkurenciji.

U zaprimljenom podnesku se u bitnom navodi slijedeće:

- Etažni vlasnici stanova u ulici Stupine B2-lamela C u Tuzli su u novembru 2018. godine podnijeli zahtjev JP Centralnom grijanju Tuzla, za ugradnju mjerača utroška toplinske energije, kalorimetra, u stanove stambene zgrade na adresi Stupine B2 ul. M Maka Dizdar Lamela C u Tuzli
 - JP Centralno grijanje Tuzla je etažnim vlasnicima odgovorilo 12.12.2018. godine dopisom br. 001-08198-2018 u kome ih je obavijestilo o uvjetima koje trebaju ispuniti da bi se uveli mjerni instrumenti, kalorimetri, u sve stanove navedenog ulaza
 - Svi stanari ulaza - 35 vlasnika stambenih jedinica su potpisali zahtjev i suglasnost za izvođenje i ugradnju mjerača toplinske energije prema uvjetima dostavljenim od strane JP Centralno grijanje. Novim zahtjevom (br. 009-1526-2019 od 19.09.2019. godine) i dopunom projektne dokumentacije od 07.01.2020. godine stanari su zatražili od JP Centralno grijanje Tuzla suglasnost na projektnu dokumentaciju za ugradnju mjerača
 - JP Centralno grijanje Tuzla je dopisom br. 03-00545-2020 od 17.01.2020. godine dalo suglasnost da je izvedbeni projekat ponuđen od strane "ING Marketing" Tuzla prihvatljiv
 - Nakon toga su preko zakonskog upravitelja "Bosna lift" Tuzla izvedeni radovi ugradnje mjernih instrumenata, kalorimetara pojedinačno za svaku stambenu jedinicu na trošak stanara koji su potpisali zahtjev za ugradnju kalorimetara pojedinačno u sve stanove
 - Svi stanari (svih 35) su uplatili početni dio sredstava od 670 KM za ugradnju kalorimetra prije početka izvedbe radova
 - Nadzor nad izvođenjem radova je učinjen od strane JP Centralno grijanje Tuzla.
- Stanari zgrade Stupine B2 Lamela C su se dana 22.10.2020. godine preko zakonskog punomoćenika obratili zahtjevom JP Centralnom grijanju Tuzla za dostavljanjem novih ugovora za potrošnju toplinske energije, sada preko ugrađenih kalorimetara.